

मार्निंग डोगरी न्यूज़ बुलेटिन, समें. 09.20 Hrs

<><><><><><>

Headlines

- प्रधानमंत्री नरेन्द्र मोदी अज्ज दिनै 11 बजे आकाशवाणी पर अपने मन की बात कार्यक्रम दे राहें देश-बदेश दे लोकें कन्नै बचार सांझे करडन।
- लेफ्टिनेंट गवर्नर मनोज सिन्हा होरें आतंकवाद दे समर्थकें खलाफ सख्त कार्रवाई दी जरूरत पर जोर पांदे होई आखेआ ऐ जे इन्ने मददगारें गी बी आतंकवादिएं आला लेखा दी सजा दिता जानी लोड़चदी ऐ।
- राष्ट्र बरोधी तत्वे आसेआ सार्वजनिक बवस्था च बगाड़ पाने दी शेंका दे मददेनजर सरकारें डोडा जिले दे भद्रवाह दे किश हिस्से च मोबाईल इंटरनेट सेवा गी 27 मई तोहड़ी आरजी तौर पर बंद करी दिता ऐ।
- मुख सचिव अटल डुल्लु होरें प्रदेश स्तर दी मंजूरिएं सरबन्धी कमेटी दी बैठक लाइयै प्रधानमंत्री कृषि सिंचाई योजना दे तैहत वाटरशैड विकास लेई 75 करोड़ 80 लख रुपें दी सलाना कार्ययोजना गी मंजूरी दिती ऐ।
- रजौरी जिले नै बरखा दे पानी दी सांभ-संभाल मतल्लक 'कैच द रेन' अभियान लेई नमें मानक तय करदे होई जिमीं हेठ पानी दा स्तर उबड़ा चुक्कने आहले 3 जहार 800 ढांचे बनाने दा रिकार्ड कायम कीता ऐ।

<><><><><><>

PM-MKB

प्रधानमंत्री नरेन्द्र मोदी होर अज्ज बड्डलै 11 आकाशवाणी पर प्रसारित होने आहले अपने महावार रेडियो कार्यक्रम “मन की बात” राए देश विदेश च रोहने आहले लोकें गी संबोधित करा’रदे न। हर महीने दे अखीरले ऐतवार प्रसारित होने आहले इस कार्यक्रम दी एह 122मीं कड़ी होग। एह कार्यक्रम 11 बजे आकाशवाणी ते दूरदर्शन दे समूलचे नेटवर्क पर प्रसारित कीता जाग। एहदे कन्नोकन्नी प्रधानमंत्री हुंदे दफ्तर, सूचना ते प्रसारण मंत्रालय ते आकाशवाणी समाचार ते डी.डी न्यूज दे यू-ट्यूब चैनलें पर बी मन की बात कार्यक्रम उपलब्ध होग। मन की बात दे हिंदी प्रसारण दे तुरत मगरा एहदा डोगरी भाषा च अनुवाद प्रसारित कीता जाग। एहदे अलावा तुस एहदा डोगरी अनुवाद इक बारी फी रातीं 8 बजे आकाशवाणी जम्मू पर सुनी सकदे हो।

<><><><><><>

LG-Hazratbal

लेफ्टिनेंट गवर्नर मनोज सिन्हा होरें लोकें गी आग्रह कीता ऐ जे ओह आतंकवादियें दा समर्थन करने ते मदाद करने आहले शख्सें गी खत्म करने च मदद करन ते नेह तत्व जेड़े लोकें दे गै बिच्च छप्पे दे न, उनेंगी कनून दे दायरे च आहनन। उनें एह गल्ल श्रीनगर च स्थित पवित्र दरगाह हजरतबल च इक गेस्ट हाउस दा नीह पत्थर रखने दे परेंत आकखी। पहलगाम आतंकी हमले पर टिप्पणी करदे होई उनें आखेआ जे आपरेशन सिंदूर आतंकवाद गी भारत आसेआ बर्दाश्त नेई करने दे रवैये गी दर्शादा ऐ।

एल.जी सिन्हा होरें आखेआ जे असेंगी आतंकी तंत्र दे खलाफ फैसलाकुन कार्रवाई करनी चाहिदी।
उनें आखेआ जे आतंकवादियें दे समर्थकें दी पंछान कीती जानी लोड़चदी ऐ ते उनेंगी जम्मू-
कश्मीर गी नुकसान पजाने आस्तै आतंकवादियें दे बराबर सजा दिती जानी लोड़चदी। एल.जी
होरें कार्यक्रम च बोलदे होई अग्गे आखेआ।

<><><><><><>

Tiranga-Rally Ramban

आपरेशन सिंदूर दी कामयाबी दा जश्न मनाने आस्तै रामबन दी बैंठी पंचैत च इक शानदार
तिरंगा रैली दा आयोजन कीता गेआ। इस कार्यक्रम च थेआरबंद बलें आस्तै मजबूत समर्थन दा
प्रदर्शन कीता गेआ जेदे च बक्ख-बक्ख पृष्ठभूमि दे लोकें हिस्सा लैता जिनें उत्साह कन्ने
राष्ट्रीय झंडा फहराया ते देशभक्ति दे नारे लाए। आकाशवाणी समाचार कन्नै गल्ल करदे होई
रैली च हिस्सा लैने आहले किश लोकें आखेआ। तोआई, आई.टी.आई जम्मू दे एन.सी.सी कैडेटें
बी तिरंगा रैली दा आयोजन करियै देशभक्ति ते इक्कजुटता दा संदेश दिता।

<><><><><><>

Doda Internet Service

सरकारै डोडा जिले दे भद्रवाह दे किश हिस्सें च मोबाईल इंटरनेट सेवा गी 27 मई तोहड़ी
आरजी तौर पर बंद करी दिता ऐ। एह फैसला राष्ट्र बरोधी तत्वे आसेआ सार्वजनिक बवस्था च
बगाड़ पाने दे मकसद कन्नै मोबाईल इंटरनेट दे माड़े इस्तेमाल दी शेंका दे मद्देनजर लैता
गेआ ऐ। आकाशवाणी दे जम्मू संवाददाता दी रिपोर्ट मूजब, गृह विभाग नै आखेआ ऐ जे जम्मू
जोन दे आईजीपी भीम सेन टूटी हुंदे निर्देशों पर 37 मोबाईल टॉवरें पर मोबाईल इंटरनेट सेवा
ते सार्वजनिक वाई-फाई सेवा गी मुअत्तल करी दिता गेआ ऐ।

हुकमै मूजब, देसै दी संप्रभुता ते अखंडता, प्रदेश दी सुरक्षा ते सार्वजनिक बवस्था बनाई रखखने दे मकसद कन्नै मोबाईल इंटरनेट सेवा गी आरजी तौर पर बंद करने दा एह फैसला लैता गेआ ऐ।

<><><><><><>

CS-Watershed Dev.

मुख्य सचिव अटल डुल्लू हुंदी अगुवाई च राज्य स्तर दी मंजूरी समिति नै बरै 2025-26 आस्तै प्रधानमंत्री कृषि सिंचाई योजना-2.0 दे तैहत वाटरशेड विकास आस्ते 75 करोड़ 80 लख रुपें दी सलाना कार्य योजना गी मंजूरी दिती ऐ। मुख्य सचिव होरें पानी दी कमी दा सामना करा रदे खेतरे च टिकाउ संपत्तियें दे निर्माण पर जोर दिता ते फायदें गी बधाने आस्तै सामुदायिक भागीदारी गी प्रोत्साहित कीता। बेठक दौरान ग्रामीण विकास मैहकमे दे सचिव एजाज असद होरें महत्वपूर्ण पैहलकदमियां सांझियां कीतियां जिंदे च वाटरशेड यात्रा अभियान-2025 बी शामिल ऐ जेड़ा इस बरे 5 फरवरी गी कठुआ जिले थमां शुरू कीता गेआ हा। इस योजना गी लागू करने आस्तै जम्मू-कश्मीर गी राष्ट्रीय स्तर पर दूआ थाहर हासल कीता ऐ।

<><><><><><>

Rajouri Catch the Rain

राजौरी जिले नै कैच दा रेन अभियान तैहत जल संचय जन भागीदारी पोर्टल पर अपलोड कीते गेदे 3 जहार 800 रिचार्ज ढांचे दे कन्नै इक रिकार्ड बनाया ऐ जेदे कन्नै जिले गी राष्ट्रीय स्तर दे ईनाम हासल करने दी योग्यता हासल होई। राजौरी दे डिप्टी कमिशनर अभिषेक शर्मा होरें इस पहल च सामुहिक जतनें दी सराहना कीती ते उंदी अमलावरी च गुणवत्ता, रख-रखाव ते पारदर्शिता पर ध्यान देने पर जोर दिता।

इस उपलब्धि गी खेतर च लम्में समें तगर जल सुरक्षा दी बक्खी इक महत्वपूर्ण गें दे रूपै च दिक्खेआ जा करदा ऐ। इस मुहिम नै स्थाई जल प्रबंधन दी कोशिशें च कामयाबी हासल करने आस्तै राजौरी गी इक नमीं पंछान दोआ रदा ऐ।

<><><><><><>

Samba-Storm

जम्मू संभाग दे मते सारे हिस्सैं च जंदी संझां आए दे तूफान ते अंधी-झक्खड़ करी आम जनजीवन पर माड़ा असर पेआ ऐ। सांबा जिले च तेज ब्हाएं करी बिजली दे केई खंभे डिग्गी गे जिस करी जिले दे केई सारे हिस्सैं च जंदी रातीं थमां गै बिजली दी सप्लाई बंद ऐ। उ'आं बिजली दी सप्लाई ब्हाल करने लेई जतन बरोबर जारी न। इस सरबंध्य च होर मती जानकारी देआ करदे न साढ़े सांबा जिला संवाददाता

<><><><><><>

JPDCL-Reasi

जम्मू खिते च बिजली दी बंड सरबंधी कारपोरेशन - जेपीडीसीएल दे रियासी डिवीजन गी पीएम सूर्य घर मुफ्त बिजली योजना दे तैहत लोकें दी बड़ी शैल प्रतिक्रिया थोआ करदी ऐ। जिले च 9 सौ 79 परोआरें इस योजना कन्नै जुड़ने लेई अपने नांs दर्ज करोआए न ते अजें तोहड़ी 126 आवेदनैं गी तोढ़ चाढ़ी दिता गेदा ऐ। इस योजना दे तैहत घरें-इमारतें दिएं छतें उप्पर सूरज दी तपश कन्नै चार्ज होने आहले पैनल लाए जंदे न तांजे लोकें गी स्वच्छ उर्जा थोए ते उंदे बिजली दे बिलें च बी कटौती होऐ।

रियासी डिवीजन दे सहायक कार्यकारी इंजीनियर विकास थापा होरें जिले च बधै करदी जागरूकता दी सराहना कीती ऐ। तोआई जिला प्रशासन नै योग्य परोआरें गी गुजारिश कीती ऐ जे ओह इस योजना कन्नै जुडन। इस सरबंथै च सहायक कार्यकारी इंजीनियर विकास थापा होरें आकाशवाणी समाचार कन्नै चेचे तौर पर गल्लबात बी कीती। उ'नै आखेआ

<><><><><><>

Announcement

आकाशवाणी जम्मू दे क्षेत्रीय समाचार एकांश आसेआ कठुआ जिले लेई अंशकालिक संवाददाता यानि पीटीसी लेई दरखास्तां मंगियां गेइयां न। इच्छुक आवेदक जेहदी उमर 24 थमां 50 ब'रें दे बश्कार ऐ ते ओह कठुआ जिले दा रौहने आहला ऐ, इस लेई आवेदन करी सकदा ऐ। मेदवार कश पत्रकारिता च पी.जी डिप्लोमा, डिग्री या कुसै बी पंजीकृत यूनिवर्सिटी थवां ग्रैजुएशन ते पत्रकारिता च 2 ब'रें दा तजुर्बा होना लोइचदा ऐ। मेदवार गी कम्प्यूटर पर खबर बनाने ते मीडिया कवरेज दे अनुभव सने सरबंथत लोइचदे उपकरणें वगैरा दा इस्तेमाल करना बी औना चाईदा। आवेदक जिला सदर दफ्तर दी 10 किलोमीटर दी हद्द दे अंदर-अंदर रौहदा होना चाईदा ऐ। दरखास्त ते लोइचदे दस्तावेजें दी कॉपी मेदवार गी क्षेत्रीय समाचार एकांश आकाशवाणी पंजतीर्थी जम्मू पिन कोड 180001 उप्पर 15 जून 2025 थवां पैहले-पैहले आइए दस्ती जमा करोआनी होग। इस बारै व्यापक जानकारी आकाशवाणी दी वेबसाइट www.newsonair.gov.in पर उपलब्ध ऐ।

<><><><><><>